

# Omadus cun resultats brilliants

Elecziuns cussegl dals chantuns

DA GION NUTEGN STGIER / ANR

■ **Reelecziun onuraivla per ils dus cussegliers dals chantuns actuals Stefan Engler e Martin Schmid. Las bleras vuschs dal suveran grischun èn ina conferma per la buna lavur dals dus parlamentararis ils davos quatter onns a Berna en la chombra pitschna.**

Da scriver dad in cumbat electoral tar las elecziuns dals dus candidats per il cussegl dals chantuns è bunamain exagerà. Communabel èn *Stefan Engler* (pcd) e *Martin Schmid* (pld) sa preschentads a la populaziun en diversas regiuns da noss chantun e communabel van els er ils proxims quatter onns a Berna. Ils dus resultats excellents per Stefan Engler che ha retschet 39 608 vuschs e Martin Schmid che ha obtegnì 35 926 vuschs èn d'attribuir a las bunas prestaziuns politicas dals dus cussegliers dals chantuns dapi il 2011 fin oz. La tscherma onureivla dad omadus politichers è er da vesair sco fatg da la buna collavuraziun che Stefan Engler e Martin Schmid han gi ils davos quatter onns e vegnan er ad avair ils proxims quatter onns a Berna. Cun ils dus cussegliers dals chantuns en uffizi trametta il chantun Grischun er per la proxima perioda da legislatura dus represchentants en la chombra pitschna a Berna che enconuschian bain il basegn dad in chantun muntagnard. Ultra da quai han Stefan Engler e Martin Schmid sa fatg ils davos quatter onns in bun num er sur las atgnas partidas.

## Malgrà la circumstanza

Stefan Engler è fitg ventiraivel dad avair fatg quel resultat excellent. El haja betg spetgà in resultat èn quella dimensiun



**Stefan Engler (san.) e Martin Schmid han fatg dus resultats excellents.**

FOTO G. N. STGIER

da vuschs. La circumstanza saja bain betg stada uschè favuraivla cun avair el e Martin Schmid nagins cuntercandidats, uschia ch'igl era strusch da spetgar in resultat uschè cler. Dal reminent ha Stefan Engler fatg 2154 vuschs dapli che anc avant quatter onns tar las elecziuns dals cussegliers dals chantuns. Il suveran grischun haja reconuschì la buna collavuraziun tranter el e Martin Schmid cun quel grond sustegn. El sa legra da cuntinuar cun la lavur a Berna, da tgirar vinavant ils contacts tranter las frac-

ziuns e da s'engaschar per noss chantun, ha menziunà Stefan Engler.

## Ina lavur pretensiusa

Fitg cuntent cun ses resultat è er Martin Schmid, ditg auter il «schumelin politic» Stefan Engler. El haja gi in grond plaschair cun sentir ses resultat grondius. Martin Schmid ha ditg ch'el engrazia fitg al suveran da noss chantun per quel sustegn exemplaric. En cumparaziun cun las vuschs fatgas avant quatter onns ha il cusseglier dals chantuns tuttina fatg

4702 vuschs dapli. El veglia cuntinuar a Berna en la chombra pitschna cun la lavur a favur da las regiuns periferas, dals chantuns muntagnards e per l'energia idraulica. La lavur sco cusseglier dals chantuns saja bain pretensiusa, dentant fitg interessanta e variabla. El saja er fitg cuntent da represchentar noss chantun vinavant cun Stefan Engler, quai che haja funcziunà fitg bain ils davos quatter onns. En l'avegnir vegnia el ad intensivar quella collavuraziun cun ses collega grischun da la chombra pitschna.